



APPLIED HISTORY JOURNAL OF MERONG MAHAWANGSA

<https://e-journal.uum.edu.my/index.php/ahjmm>

How to cite this article:

Samsul Kamil Osman. (2023). Propaganda surat khabar *Harian Rakjat* semasa konfrontasi Indonesia-Malaysia, 1963-1965. *Applied History Journal of Merong Mahawangsa*, 1, 26–53. <https://doi.org/10.32890/ahjmm2023.1.3>

PROPAGANDA SURAT KHABAR *HARIAN RAKJAT* SEMASA KONFRONTASI INDONESIA-MALAYSIA, 1963–1965

(Propaganda of Harian Rakjat Newspaper During the Indonesia-Malaysia Confrontation, 1963-1965)

Samsul Kamil Osman

*Awang Had Salleh Graduate School,
Universiti Utara Malaysia (UUM), Malaysia*

samshamida15uum@gmail.com

Received: 2/2/2023

Revised: 13/6/2023

Accepted: 25/7/2023

Published: 31/7/2023

ABSTRAK

Kajian ini bertujuan untuk meninjau kegiatan propaganda surat khabar *Harian Rakjat* yang diterbitkan oleh Partai Komunis Indonesia (PKI) semasa Konfrontasi Indonesia-Malaysia pada tahun 1963 sehingga 1965. Tujuan kajian ini adalah melihat sejauhmana PKI memanfaatkan surat khabar *Harian Rakjat* untuk menyebarkan propaganda untuk meraih sokongan rakyat mengganyang Malaysia. Strategi PKI menggunakan propaganda melalui tulisan dan karikatur dilihat telah berjaya menyemai kebencian rakyat terhadap pemimpin dan rakyat Malaysia. Kajian ini menggunakan metodologi pengumpulan data melalui kaedah kepustakaan. Kajian perpustakaan ditumpukan kepada penggunaan dokumen-dokumen surat khabar terbitan Parti Komunis Indonesia yang tersimpan di Perpustakaan Nasional Republik Indonesia dan kajian lapangan seperti temubual dan pemerhatian. Hasil kajian menunjukkan bahawa propaganda Parti Komunis Indonesia menggunakan surat khabar, baik melalui tulisan-tulisan mahupun penggunaan karikatur telah berjaya mempengaruhi rakyat Indonesia untuk menyokong dasar politik konfrontasi Presiden Sukarno terhadap Malaysia. Sokongan rakyat ini diterjemahkan melalui sambutan rakyat terhadap kempen Mengganyang Malaysia yang dilaungkan oleh Presiden Sukarno.

Kata kunci: Propaganda, Surat Khabar, Parti Komunis Indonesia, Konfrontasi Indonesia-Malaysia.

ABSTRACT

This research aimed to review the propaganda activities involved in the Harian Rakjat newspaper which was published by the Indonesian Communist Party (PKI) during the Indonesia-Malaysia Confrontation between 1963-1965. The main objective of this research was to discover how far PKI utilise the Harian Rakjat newspaper to spread propaganda in order to gain the Indonesia citizen's support to (go against, criticise, destroy) Malaysia. PKI's strategies spreading propaganda through caricature and writing were deemed successful in sowing hatred among Indonesian citizens towards Malaysian leader and citizens. This research employed the library research method in collecting data. The library research was centralized on the use of newspapers published by the Indonesian Communist Party which was kept at the National Library of Indonesia as well as through field studies which encompassed interviews and observations. The findings of this research had shown that the Indonesian Communist Party's propaganda in utilising the newspaper either through writings or caricatures had successfully influenced Indonesian citizens to support Sukarno's political confrontation towards Malaysia. This support was portrayed through the great responses from the Indonesian citizen on the "Mengganyang Malaysia campaign" masterminded and chanted by Sukarno.

Keywords: *Propaganda, Newspaper, Indonesian Communist Party, Malaysia-Indonesia Confrontation.*

PENGENALAN

Peristiwa konfrontasi Indonesia-Malaysia yang terjadi pada tahun 1963-1966 merupakan suatu peristiwa unik. Pelbagai dimensi boleh dijadikan objek kajian walaupun telah banyak kajian-kajian terdahulu yang telah dilakukan. Penulis membuat pilihan untuk mengkaji pengaruh Parti Komunis Indonesia (PKI) dalam era konfrontasi. PKI adalah salah satu organisasi politik yang mempunyai hubungan sangat akrab dengan Presiden Sukarno. Hubungan akrab Sukarno dan PKI yang ketika itu dipimpin oleh D.N.Aidit memuncak pada tahun 1960 apabila Sukarno melancarkan slogan NASAKOM (Nasionalis, Agama dan Komunisme). Dengan kata lain, peranan PKI menjadi sangat penting dalam pemerintahan Sukarno. Kedudukan yang istimewa dimiliki oleh PKI dalam pentadbiran Sukarno ini mengundang kecurigaan dan sikap waspada Tentera Nasional Indonesia Angkatan Darat (TNI AD). TNI AD melihat penglibatan aktif PKI dalam pentadbiran dan kebijaksanaan pemerintah Indonesia akan mengundang persepsi yang tidak baik terhadap kuasa besar dari Barat terutama Amerika Syarikat dan sekutu mereka yang menentang ideologi komunisme.

Hubungan rapat PKI dan Sukarno menyebabkan Indonesia menjalin hubungan baik dengan negara-negara blok komunis seperti Republik Rakyat China (RRC), Soviet Union, Korea Utara dan Vietnam. Sukarno yang dianggap sebagai pejuang anti-imperalisme dan anti-kolonialisme telah menyebabkan beliau menjadi pemimpin yang disanjung apalagi selepas Indonesia menganjurkan Persidangan Negara-Negara Asia-Afrika di Bandung pada tahun 1955. Bagi menunjukkan sikap anti-imperialisme dan kolonialisme, Indonesia telah mengisytiharkan politik konfrontasi menentang pembentukan Persekutuan Malaysia pada

tahun 1963 sehingga 1966. Sukarno berpendirian pembentukan Persekutuan Malaysia yang menggabungkan Tanah Melayu, Singapura, Sarawak, Sabah dan Brunei yang sebelumnya dikuasai oleh British merupakan pelanjutan pemerintahan kolonial (*Harian Rakjat* 1963, 9 Februari).

Sepanjang berlangsungnya Konfrontasi Ganyang Malaysia, Indonesia telah melaksanakan pelbagai kempen yang bertujuan “menghancurkan” Persekutuan Malaysia. Propaganda politik, sabotaj ekonomi dan aksi ketenteraan dilaksanakan untuk tujuan menggagalkan pembentukan Malaysia. PKI tentu sekali menjadi tangan kanan Sukarno untuk melancarkan perang saraf melalui propaganda di surat khabar terbitan mereka seperti *Harian Rakjat* dan *Bintang Timur*. Penggunaan surat khabar sebagai lidah utama menyalurkan maklumat kepada rakyat. PKI telah mengapi-apikan pemikiran rakyat serta menyemai kebencian rakyat terhadap Malaysia, PKI juga secara agresif menyeru rakyat Indonesia terutama golongan pemuda untuk menyertai pasukan sukarelawan yang dihantar untuk melakukan serangan bersenjata di perbatasan Sarawak, Brunei, Sabah dan Tanah Melayu. PKI menjalin hubungan dengan kelompok-kelompok beraliran kiri, termasuk Partai Komunis Malaya di Semenanjung, Sarawak, Sabah dan Brunei (*Harian Rakjat*, 1963, 1 Ogos).

Perbincangan peranan surat khabar sebagai alat propaganda yang digunakan PKI ketika berlangsungnya konfrontasi, tidak terlepas dari melihat besarnya pengaruh surat khabar terhadap perjuangan bangsa Indonesia. Sejak dari zaman pergerakan kebangsaan lagi, surat khabar memainkan peranan menyemaikan rasa nasionalisme dan patriotisme. Sepanjang berlangsungnya perang kemerdekaan Indonesia, surat khabar merupakan nadi penting berjuang menyakinkan rakyat untuk mempertahankan proklamasi kemerdekaan Indonesia (Syamsul Basri, 1987). Surat khabar berfungsi sebagai alat penyampai berita dari pemerintah atau organisasi politik dan kelompok tertentu kepada masyarakat. Kepentingan surat khabar ini sebenarnya telah bermula sejak zaman penjajahan Belanda lagi. Keadaan ini telah membangkitkan kesedaran kepada golongan elite moden Indonesia untuk menerbitkan surat khabar sebagai media untuk menyalurkan gagasan, cita-cita dan kepentingan politik mereka, terutama bagi mendapatkan pengaruh dan sokongan rakyat Indonesia dalam menyokong masa depan negara Indonesia yang merdeka (M. Gani, 1987).

Pada zaman revolusi perang kemerdekaan, surat khabar dijadikan sebagai alat untuk mempropagandakan kemerdekaan Indonesia. Surat khabar berperanan penting bagi kerajaan Indonesia untuk mencari kebenaran dan mempertahankan kemerdekaan serta mempengaruhi rakyat melawan penjajah. Surat khabar yang lahir di zaman revolusi lantang menyuarakan perjuangan dan mempertahankan kemerdekaan yang telah diproklamasikan (Samuel Pandjaitan, 2005). Surat khabar zaman revolusi disebut sebagai akhbar perjuangan kerana sifat keberaniannya menegakkan kebenaran perjuangan. Surat khabar dianggap sebagai satu kekuatan dalam perjuangan walaupun tidak menggunakan kekerasan senjata, tetapi hanya ketajaman mata pena atau tulisan (Samuel Pandjaitan, 2005).

Meletusnya peristiwa G30S/PKI telah memberi impak terhadap pengaruh PKI dalam kerajaan Indonesia. Peristiwa ini telah memberi satu tamparan hebat kepada Sukarno yang selama ini berdamping rapat dengan pemimpin PKI. Satu persoalan yang menjadi perhatian penulis adalah, apakah politik konfrontasi Ganyang Malaysia dijadikan kesempatan oleh PKI untuk mengalih perhatian rakyat supaya mereka dapat melakukan langkah mengambil alih kerajaan dan menubuhkan Republik Komunis Indonesia? Apakah perkara ini sebenarnya sudah lama

disedari oleh pemimpin tertinggi Angkatan Darat Tentara Nasional Indonesia? Sejauhmanakah peranan media massa terutama surat khabar terbitan PKI dimanfaatkan untuk menarik simpati rakyat supaya meneruskan perjuangan revolusi untuk kepentingan PKI?

SOROTAN LITERATUR

Sebenarnya belum banyak penulis yang membuat kajian tentang peranan surat khabar di Indonesia, baik semasa revolusi mahupun semasa konfrontasi. Ada empat buku yang menurut penulis boleh dijadikan rujukan dan membantu kajian penulis. Buku pertama adalah *Kesaksian Perdjoeangan Pena* (Samuel Pandjaitan, 2005). Buku ini mengupas bagaimana pengaruh idealisme pengarang dalam penulisan surat khabar. Menurut Samuel Pandjaitan, pengarang menggunakan idealisme dalam penulisan untuk menjadikan surat khabar sebagai penyokong kerajaan dan berfungsi sebagai alat kawalan sosial (Samuel Pandjaitan, 2005). Beliau berpendapat, media massa di Indonesia tidak memiliki kebebasan sepenuhnya dan masih dianggap sebagai penyalur maklumat kerajaan. Buku ini memberi maklumat awal kepada penulis tentang peranan akhbar kepada masyarakat Indonesia.

Seterusnya, buku yang menjelaskan tentang surat khabar dan perkembangannya di Indonesia. Buku karya Drs. I. Taufik bertajuk *Sejarah dan Perkembangan Pers di Indonesia* (I. Taufik, 1997). Taufik (1997) berpendapat media massa Indonesia sejak dari zaman kolonial hingga sekarang merupakan alat untuk memperjuangkan hak-hak bangsa sebagai usaha memperbaiki nasib rakyat. Oleh yang demikian, dalam melaksanakan tanggungjawab dan bersesuaian dengan keahliannya surat khabar berperanan meraih simpati rakyat untuk melaksanakan tuntutan-tuntutan yang bersesuaian dengan kehendak kerajaan. Fokus penulisan buku ini lebih kepada pengaruh media massa secara umum kepada masyarakat Indonesia.

Kajian selanjutnya adalah buku karya F. Rachmadi (2001), yang memberi fokus kepada pola hubungan surat khabar dengan pemerintah. Beliau membuat perbandingan peranan akhbar dari beberapa buah negara. Rachmadi berpendapat, surat khabar dan pemerintah mempunyai pertalian yang kuat dari sudut sistem dan struktur politik yang berlaku di sesuatu negara di mana lembaga itu berada. Hubungan ini sangat berpengaruh kepada perkembangan dan pembentukan masyarakat dalam semua aspek sama ada sosial, politik dan ekonomi (Rachmadi, 2001). Kajian ini membantu penulis untuk memahami peranan media massa dalam mempengaruhi tindakan rakyat. Kajian ini tidak memberi fokus secara spesifik kepada peranan surat khabar dalam sesuatu zaman. Oleh yang demikian, penulis ingin mengisi kekosongan tersebut dengan memfokuskan kajian peranan surat khabar pada zaman konfrontasi Indonesia-Malaysia, 1963 sehingga 1966.

Buku berikutnya adalah kajian yang banyak membantu dan memberi pengetahuan tentang kepentingan media massa terutama surat khabar sebagai agen perubahan masyarakat di Indonesia. Karya Andi Suwirta (2000) mengupas dan menganalisis peristiwa sejarah menggunakan surat khabar khususnya mengenai realiti akhbar pada zaman revolusi kemerdekaan Indonesia. Andi berpendapat surat khabar melaporkan realiti sosial pada zamannya. Surat khabar juga merupakan penilaian terhadap khazanah sejarah bangsa Indonesia (Andi Suwirta, 2000). Buku ini adalah satu-satunya kajian khusus tentang surat khabar yang berperanan di Jawa pada zaman revolusi kemerdekaan Indonesia 1945 sehingga

1947. Kajian Andi memberi ruang kelompondan kepada penulis melihat kajian peranan media massa pada zaman konfrontasi Indonesia-Malaysia 1963 sehingga 1966.

Terdapat dua lagi kajian oleh Saskia E. Wieringa dan Nursyahbani Katjasungkana (2020) telah membincangkan sejarah genosida dan kempen propaganda yang menuntut supaya ditubuhkan International People's Tribunal on Crimes against Humanity Indonesia. Sarjana ini berfokuskan melihat kempen propaganda kebencian yang menuntut supaya Indonesia menghentikan hasutan membunuh warga Indonesia yang dianggap berfahaman komunis dan terlibat dalam G30S PKI. Kajian Katharine McGregor (2016) juga menarik untuk dijadikan rujukan untuk melihat hubungan di antara Parti Komunis Malaya dan Partai Komunis Indonesia. Kajian-kajian ini akan dapat membantu penulis untuk memahami beberapa situasi semasa berlansungnya konfrontasi Indonesia Malaysia.

PERMASALAHAN KAJIAN

Hubungan Malaysia dan Indonesia mempunyai ciri-ciri yang unik. Kedua-dua negara ini mempunyai banyak persamaan yang mampu menjadi pengikat memperkukuhkan hubungan di antara rakyat kedua-dua negara. Sebagai negara yang berdaulat, kedua-dua negara akan mendahulukan kepentingan rakyat masing-masing dalam menjalin hubungan, walaupun kadang kala terpaksa mengorbankan kepentingan persaudaraan. Mengambil sikap mendahului rakyat, menyebabkan setiap negara bersaing dan berusaha mencapai tujuan masing-masing seperti kepentingan keamanan, keselamatan wilayah, kekuatan ekonomi dan pengaruh politik. Persaingan ini kadangkala mewujudkan konflik sehingga sering kali telah mencacatkan hubungan kedua-dua negara sehingga kini. Munculnya ketegangan biasanya disambut dengan emosi oleh sebahagian masyarakat Indonesia yang menyebabkan wujud semula slogan era Orde Lama, antaranya "Ganyang Malaysia" (Linda Sunarti, 2013).

Oleh sebab yang demikian, sangat menarik untuk membuat kajian lebih mendalam tentang mengapa tercetusnya konfrontasi pada tahun 1963-1966 melalui peranan media massa. Sesuatu yang menarik untuk dikaji adalah kesungguhan Parti Komunis Indonesia menyebarkan propaganda mengapi-apikan kemarahan rakyat Indonesia terhadap rakyat Malaysia. Media massa terutama surat khabar menjadi alat utama yang digunakan pihak Indonesia untuk menyerang Malaysia menjelang dan semasa berlansungnya konfrontasi. Pengaruh surat khabar kepada masyarakat Indonesia sangat besar terutama ketika memasuki era perjuangan revolusi kemerdekaan pada tahun 1945. Surat khabar membawa pengaruh kepada perkembangan sosial-politik Indonesia. Media Massa terutama surat khabar telah berjaya mempengaruhi masyarakat untuk membentuk kekuatan revolusioner yang berhasil menumbangkan rejim tentera Belanda (Mochtar Lubis, 1992).

Ketika meletusnya konflik konfrontasi Indonesia-Malaysia 1963-1966, sekali lagi surat khabar memainkan peranan penting untuk meraih simpati rakyat untuk menyokong tindakan pemerintah Indonesia. Sepanjang tempoh waktu tersebut, surat khabar melaporkan pelbagai bentuk berita dan rencana berkaitan mengapa perlunya rakyat menyokong langkah mengganyang Malaysia. PKI melalui surat khabar *Harian Rakjat* dan *Bintang Timur* antara yang paling aktif mempengaruhi rakyat untuk mengapi-apikan rasa kebencian terhadap Malaysia. Pelbagai strategi digunakan untuk menarik simpati dan perhatian rakyat untuk menyokong langkah kerajaan membenci Malaysia. Penggunaan lakaran karikatur, rencana,

puisi, lirik lagu dan setiap hari berita tentang aksi ganyang Malaysia menjadi tajuk utama muka hadapan surat khabar *Harian Rakjat* dan *Bintang Timur*.

Berbeza dengan pendekatan surat khabar *Harian Rakjat* dan *Bintang Timur* yang dikendalikan oleh PKI, akhbar-akhbar lain yang dikendalikan oleh PNI dan Masjumi tidak terlalu agresif melakukan propaganda menentang Malaysia. Kesempatan ini dimanfaatkan sepenuhnya oleh PKI untuk mendapatkan sokongan dan simpati rakyat supaya menyokong perjuangan politik mereka. Surat khabar *Harian Rakjat* dan *Bintang Timur* menjadi alat dan senjata utama PKI untuk meraih sokongan rakyat. PKI menjadi sangat dekat dengan Sukarno dan merupakan penyokong kuat politik revolusi untuk mengganyang Malaysia. Konfrontasi Indonesia-Malaysia menjadi sangat penting kepada kemerdekaan rakyat Indonesia, membolehkan PKI menggunakan akhbar *Harian Rakjat* dan *Bintang Timur* untuk terus melakukan propaganda supaya rakyat terus bersimpati dan menyokong perjuangan mereka.

PERSOALAN KAJIAN

Berdasarkan kepada permasalahan tersebut, soalan-soalan yang perlu dijawab adalah seperti berikut:

- a) Apakah propaganda Parti Komunis Indonesia semasa Konfrontasi Indonesia-Malaysia, 1963-1966?
- b) Bagaimanakah PKI menggunakan akhbar *Harian Rakjat* sebagai alat propaganda semasa Konfrontasi Indonesia-Malaysia, 1963-1966?
- c) Sejauhmanakah akhbar *Harian Rakjat* berkesan sebagai alat propaganda semasa konfrontasi Indonesia-Malaysia, 1963-1965?

OBJEKTIF KAJIAN

Berdasarkan kepada permasalahan di atas, objektif kajian ini ialah:

- a) Mengkaji propaganda Parti Komunis Indonesia semasa Konfrontasi Indonesia-Malaysia 1963 sehingga 1965.
- b) Menilai sejauhmana PKI berkesan melaksanakan propaganda melalui akhbar *Harian Rakjat* semasa Konfrontasi Indonesia-Malaysia 1963 sehingga 1966.
- c) Menganalisis impak propaganda akhbar *Harian Rakjat* terhadap konfrontasi Indonesia-Malaysia 1963 sehingga 1965.

METODOLOGI KAJIAN

Kajian ini merupakan penelitian sejarah yang mengkaji penglibatan Parti Komunis Indonesia semasa Konfrontasi Indonesia-Malaysia 1963-1966. Metodologi yang digunakan adalah metodologi sejarah, yang terdiri daripada empat tahap, iaitu heuristik, kritik, interpretasi dan historiografi (Louis Gottschalk, 1986). Pengumpulan data seperti surat khabar dan dokumen kerajaan berkaitan konfrontasi dilakukan di Perpustakaan Negara Republik Indonesia di Jakarta. Penulis melakukan penelitian terhadap surat khabar yang diterbitkan di Jakarta sekitar tahun 1963 sehingga tahun 1966. Fokus utama adalah akhbar yang diterbitkan Parti Komunis Indonesia seperti akhbar *Harian Rakjat* dan *Bintang Timur*. Selain itu buku-buku penting yang diterbitkan oleh Departmen Luar Negeri Republik Indonesia terbitan tahun 1963. Buku-buku ini mengandungi koleksi bahan-bahan berkaitan “Masalah Malaysia” jilid I,II dan III terbitan tahun 1964. Selain itu penulis juga melakukan penelitian kepustakaan di Perpustakaan Kementerian Luar Negeri Indonesia di Jakarta untuk meneliti dokumen-dokumen rasmi kerajaan Indonesia berkaitan dengan Konfrontasi. Kaedah temubual juga digunakan untuk mendapatkan penjelasan lanjut berkaitan sesuatu laporan atau peristiwa dengan menemubual tokoh-tokoh yang mempunyai hubungan secara langsung atau secara tidak langsung dengan fokus kajian.

HASIL KAJIAN

Propaganda PKI dan Politik Konfrontasi Sukarno

Iklim politik Indonesia berada di dalam situasi yang meruncing menjelang tahun 1959. Dewan Konstituante sebagai badan yang diberi tanggungjawab merangka dan menggubal Perlembagaan baru Republik Indonesia tidak dapat melaksanakan tugas sepertimana yang diharapkan. Parti-parti politik yang menjadi anggota dewan tidak dapat mencapai kata sepakat kerana perbezaan ideologi dan fahaman politik. Keadaan ini telah melemahkan peranan dewan dan sekaligus menggagalkan pelaksanaan Sistem Demokrasi Berparlimen di Indonesia.

Dalam usaha meraih sokongan rakyat dan menjamin kestabilan politik, Sukarno telah melakukan beberapa pembaharuan dalam pendekatan politik. Salah satu yang paling mendapat perhatian umum adalah tindakan berani Sukarno menyatukan semua aliran politik dalam satu gabungan dikenali sebagai NASAKOM. NASAKOM adalah singkatan daripada kata Nasionalis, Agamawan dan Komunis, yang terdiri pelbagai latar belakang parti-parti politik berpengaruh di Indonesia ketika itu. Sukarno ingin menamatkan perpecahan politik akibat dari perbezaan fahaman dan ideologi. Melalui NASAKOM, Sukarno mengharapkan wujudnya kesepaduan dan kerjasama politik yang menjadi teras kepada masa depan Republik Indonesia.

Pengaruh PKI yang semakin menyerlah ketika berlangsungnya politik konfrontasi terhadap Malaysia menyebabkan PKI bertindak mempengaruhi dan meyakinkan rakyat supaya memberi sokongan penuh terhadap langkah politik yang diambil Sukarno. PKI sedar, memberi sokongan kepada Sukarno akan memberi ruang yang besar kepada PKI untuk mengembangkan sayap mereka dan mengetepikan lawan-lawan politik mereka terutama tekanan dari Angkatan Darat. PKI menggunakan kesempatan mendampingi Sukarno supaya Angkatan Darat tidak dapat menyingkirkan pemimpin-pemimpin PKI dari arus perdana. (Rex Mortimer, 2011) Selain itu, PKI juga menjadi penghubung di antara Sukarno dan pemimpin

Republik Rakyat China terutama dalam memperoleh bantuan seperti peralatan senjata ketenteraan. Pemimpin-pemimpin PKI juga sangat berpengaruh dalam merancang langkah dan menyusun kebijaksanaan ketika Sukarno mendepani konflik konfrontasi dengan Malaysia. Pengaruh kuat PKI menyebabkan Sukarno merasa langkah yang diambil oleh beliau sangat menepati kehendak rakyat, kerana terlihat dari sokongan yang diberikan oleh rakyat terhadap beliau.

Keyakinan Sukarno terhadap PKI dan keberhasilan mendapatkan sokongan rakyat ketika berdepan konflik konfrontasi tidak terlepas dari kejayaan propaganda PKI. PKI memanfaatkan surat khabar yang mereka terbitkan antaranya, *Harian Rakjat* untuk meraih sokongan dan menanam kebencian rakyat terhadap Malaysia. Sejak awal berlangsungnya konfrontasi, *Harian Rakjat* melalui laporan berita bertulis dan karikatur telah menuangkan api kemarahan serta rasa kebencian rakyat Indonesia terhadap Malaysia. Malaysia dijadikan musuh yang harus dihancurkan kerana bakal menggugat kemerdekaan Indonesia. Selain itu, Malaysia dianggap sebagai boneka kuasa-kuasa imperialisme Barat yang bertujuan mengaut kekayaan dan menghancurkan bangsa Indonesia.

Harian Rakjat menghasut rakyat untuk melakukan aksi mengganyang Malaysia. Melalui tulisan-tulisan yang disebar ia berusaha menyakinkan rakyat bahawa Malaysia bekerjasama dengan kuasa-kuasa Barat dan telah menyebabkan rakyat Indonesia mengalami kesengsaraan dan kemiskinan. Kemiskinan yang membelenggu rakyat akibat tekanan ekonomi ketika itu menyebabkan rakyat yakin dengan propaganda PKI. *Harian Rakjat* menjadi alat yang digunakan oleh PKI untuk mendapatkan sokongan terhadap kelangsungan perjuangan mereka. Melalui propaganda yang disiarkan baik melalui tulisan atau karikatur, menunjukkan rakyat sangat terpengaruh sehingga ada yang sanggup menawarkan diri menjadi sukarelawan untuk dihantar ke perbatasan Malaysia untuk menggempur tentera musuh. PKI menggunakan kesempatan ini untuk mengusulkan penubuhan Angkatan Perang Kelima yang keanggotaannya terdiri daripada petani, buruh dan organisasi pemuda Indonesia. Pasukan ini menjadi pelapis, selain ditawarkan senjata dan latihan ketenteraan sepertimana pasukan-pasukan lain yang sedia ada.

Politik Ganyang Malaysia telah dimanfaatkan oleh PKI untuk membantu Sukarno meraih sokongan rakyat. Sukarno memberi kepercayaan penuh kepada PKI dan kesempatan itu digunakan sebaik-baiknya oleh PKI untuk meluaskan pengaruh politik mereka. Semua organisasi dan massa PKI digunakan sepenuhnya untuk menjamin kejayaan politik konfrontasi Sukarno. Surat khabar menjadi alat propaganda yang paling berhasil mempengaruhi rakyat. Sokongan rakyat yang diraih oleh PKI melalui media massa merupakan jaminan besar terhadap kejayaan dasar politik konfrontasi Sukarno. Dalam hal ini, *Harian Rakjat* tidak hanya menjadi senjata utama PKI untuk meraih sokongan rakyat untuk menyokong ideologi politik mereka, tetapi juga berhasil membantu menghancurkan musuh-musuh politik mereka.

PKI memanfaatkan penyiaran bahan-bahan berita yang dapat menimbulkan kemarahan dan simpati rakyat terhadap musuh politik Indonesia. Penggunaan slogan dan laporan berita yang disampaikan secara berulang-ulang menjadi strategi utama PKI. Selain menyiarkan berita dalam bentuk tulisan, PKI juga menggunakan karikatur untuk menambat hati rakyat supaya tertambat hati mereka dengan laporan berita yang mereka sampaikan. Strategi ini sangat berkesan sebagai propaganda PKI untuk menanam kebencian dan kemarahan rakyat terhadap

Malaysia. Situasi ini menyebabkan semakin hari sokongan terhadap dasar politik Sukarno diterima baik oleh rakyat.

PKI dan Konfrontasi Ganyang Malaysia

Menjelang beberapa hari sebelum Persekutuan Malaysia ditubuhkan secara rasmi pada 16 September 1963, Sukarno menyampaikan pidato khas sebagai usaha mendesak rakyat untuk menolak penubuhan Malaysia (Sukarno, 2019). Tidak seperti kebiasaannya, Sukarno menyampaikan Pidato di Istana Merdeka, tetapi kali ini pidato tersebut diselenggarakan di Stadium Gelora Bung Karno yang mempunyai kapasiti yang lebih besar (Sukarno, 2019). Di bahagian pembukaan pidato tersebut, Sukarno membuat penegasan bahawa amanat penderitaan rakyat yang ingin beliau sampaikan tersebut bukan sekadar hal-hal yang berkaitan dengan yang terjadi di Indonesia semata-mata. Beliau turut ingin mengupas tentang penderitaan umat manusia yang menjadi sebahagian daripada penderitaan rakyat Indonesia. Sukarno menghubungkan revolusi Indonesia merupakan jalinan revolusi umat manusia (Sukarno, 2019). Kepercayaan dan Sokongan dari Sukarno digunakan oleh PKI untuk mengembangkan ideologi komunis yang dianggap lebih sesuai dengan keinginan Sukarno supaya Indonesia memiliki masyarakat yang berjiwa revolusi.

Sebagai persediaan melaksanakan konfrontasi terhadap Malaysia, Presiden Sukarno telah membentuk sebuah badan yang dikenali sebagai Mesyuarah Pembantu pemimpin Revolusi (MPPR). Tujuan badan tersebut ditubuhkan adalah untuk membantu presiden selaku Pemimpin Besar Revolusi untuk mengatur, merancang dan melancarkan revolusi rakyat. Perkembangan terkini, menghadirkan peluang untuk PKI memanfaatkan kesempatan dengan mengumpulkan massa untuk bersedia melakukan aksi membela dasar politik Sukarno. PKI telah mengumpulkan dan menggerakkan massa yang terdiri daripada rakyat pelbagai lapisan masyarakat untuk menyokong mereka melakukan tunjuk perasaan secara besar-besaran di hadapan Kedutaan Besar British dan Kedutaan Besar Malaysia di Jakarta. (*Harian Rakjat*, 24 September, 1963).

Konfrontasi Ganyang Malaysia menjadi memuncak apabila berlaku aksi merusuh secara besar-besaran di Jakarta. Rusuhan tersebut menyebabkan Kedutaan Besar British menjadi sasaran rakyat melepaskan kemarahan. Bangunan Kedutaan Besar British telah dibakar, begitu juga dengan rumah kediaman diplomat dan warganegara British diceroboh. Selain itu, kenderaan milik mereka juga telah dibakar dan harta benda mereka dirampas serta dimusnahkan (Onghokham, 2002). Ganyang Malaysia mencetuskan situasi yang penuh emosi dan rakyat terus dibakar semangat mereka untuk menyokong dasar politik Sukarno. PKI memainkan peranan yang cukup besar untuk tujuan mendapatkan sokongan dan menyebarkan rasa kebencian rakyat terhadap Malaysia. Rasa kebencian dan marah tersebut dilepaskan dengan melakukan aksi demonstrasi secara berterusan sambil melaungkan slogan anti-imperialisme. Tentu sekali aksi-aksi ini disusun dengan baik oleh PKI dengan memanfaatkan organisasi-organisasi mereka supaya sokongan rakyat terus meningkat dari masa ke semasa. PKI berjaya menanam rasa kebencian rakyat Indonesia bukan hanya terhadap Malaysia, malah terhadap British dan Amerika Syarikat (Onghokham, 2002).

Ketika Sukarno mengambil keputusan untuk melancarkan politik konfrontasi terhadap Malaysia, PKI menjadi parti politik pertama yang menyatakan sokongan mereka terhadap pendirian Sukarno (Onghokham, 2002). Kempen konfrontasi terhadap Malaysia telah

mengubah pandangan masyarakat terhadap kaum komunis di Indonesia. Penglibatan PKI memberi impak kepada Sukarno untuk menyakinkan rakyat Indonesia bahawa mereka berada di pihak yang menang dalam konflik tersebut. Bagi PKI pula, perjuangan tersebut merupakan kesinambungan dari perjuangan kaum komunis di seluruh dunia untuk menentang imperalisme Barat di Asia. Dalam masa sama, penyertaan PKI telah mendapat sokongan penuh dari Parti Komunis China (Onghokham, 2002).

Sukarno didesak oleh PKI supaya mengambil pendirian untuk menyokong perjuangan rakyat Brunei. Walaupun tidak mempunyai niat untuk melaksanakan dasar perluasan wilayah, tetapi mereka siap untuk membantu dan menyokong perjuangan kemerdekaan bangsa lain. Indonesia menyatakan kesediaan mereka untuk membantu bangsa-bangsa yang berdepan melawan penjajah, walaupun terpaksa berdepan dengan peperangan (Rex Mortimer, 2011). PKI menyokong penuh dasar konfrontasi Indonesia terhadap Malaysia kerana sejak awal lagi beranggapan pembentukan Persekutuan Malaysia sebagai langkah menjayakan rancangan neo-kolonialisme British. British menurut pandangan PKI berusaha menyekat keinginan rakyat Kalimantan Utara, khususnya Brunei yang ingin merdeka dan membentuk kerajaan sendiri yang bebas dari campurtangan kuasa asing (Rex Mortimer, 2011). Bagi tujuan mendapatkan sokongan rakyat Indonesia dan melakukan desakan supaya pemerintah Indonesia mengambil langkah pro-aktif, PKI menggunakan akhbar *Harian Rakjat* untuk menyemai propaganda penentangan terhadap Malaysia.

Pendirian tegas PKI terhadap konfrontasi Indonesia-Malaysia ditunjukkan dari kecaman pemimpin utama mereka bernama D.N. Aidit. Aidit mengecam pemimpin Malaya yang menganggap rakyat negeri-negeri di sekelilingnya sebagai bangsa serumpun, tetapi melalui tindakannya berusaha melaksanakan perluasan wilayah. (*Harian Rakjat*, 13 Disember, 1962). *Harian Rakjat* dan *Bintang Timur* digunakan sepenuhnya oleh PKI untuk melontarkan kritikan dan kecaman terhadap British dan Malaya, terutama dikhususkan secara peribadi terhadap Tunku Abdul Rahman. Selain itu, kritikan tersebut juga bertujuan untuk mengapi-apikan kemarahan rakyat Indonesia terhadap Malaysia (Rex Mortimer, 2011). PKI bagaimanapun menafikan terlibat secara langsung dalam pemberontakan di Kalimantan Utara, tetapi menegaskan mereka sangat menghormati perjuangan para pemberontak tersebut. Menurut D. N. Aidit, sokongan PKI tersebut berasaskan kepada prinsip sesuatu revolusi kemerdekaan harus diberikan sokongan oleh semua kaum progresif di seluruh dunia. Oleh yang demikian, rakyat Indonesia yang mencintai perdamaian tidak terkecuali kerana mereka juga mencintai kemerdekaan (Rex Mortimer, 2011).

Sokongan yang diberikan terhadap kempen konfrontasi terhadap Malaysia telah mengubah orientasi haluan perjuangan PKI dari aliran kebijaksanaan yang berkiblatkan Soviet Union kepada kebijaksanaan Parti Komunis China (Rex Mortimer, 2011). Konfrontasi Indonesia-Malaysia memberi impak yang menguntungkan bagi PKI. Semasa konfrontasi berlangsung, PKI menjalankan peranan mereka mengetengahkan kepada umum laungan tema-tema perjuangan Sukarno dengan propaganda yang dilakukan menggunakan surat khabar mereka. PKI juga bertindak meluaskan pengaruh ideologi mereka. *Harian Rakjat* dimanfaatkan oleh PKI dengan kreatif dan inovasi untuk mengetengahkan perjuangan pemikiran Sukarno. Situasi ini menyebabkan lama-kelamaan Sukarno lebih banyak terlihat meminjam dan menggunakan konsep-konsep ideologi PKI. Sukarno lebih banyak menggunakan istilah-istilah radikal yang sering dipakai oleh penulis-penulis beraliran marxisme. *Harian Rakjat* memuatkan tulisan dan lakaran karikatur yang membela tindakan politik Sukarno yang dianggap “berdikari” demi

memperjuangkan maruah bangsa (Sukarno, 2019). PKI menjadi organisasi politik yang paling kuat dan gigih membela Sukarno. Ketika berlangsungnya politik konfrontasi, ada pendapat yang menyatakan Sukarno dan PKI tidak dapat dipisahkan lagi. (Ridwan Saidi, Komunikasi Peribadi, 23 Februari 2020).

Surat Khabar *Harian Rakyat*: Ganyang Malaysia melalui Tulisan dan Karikatur

Menjelang tahun 1963, pemerintah Republik Indonesia menghadapi tentangan besar menentukan sikap dasar politik luar negeri mereka. Isu pembentukan Persekutuan Malaysia yang diajukan oleh Tunku Abdul Rahman dan kerajaan British telah menimbulkan rasa tidak senang Presiden Sukarno dan para pemimpin Indonesia. Ekoran daripada tindakan tersebut, Presiden Sukarno telah mengambil ketetapan bahawa Republik Indonesia akan melaksanakan Dasar Politik Konfrontasi terhadap Malaysia. Sukarno berpendirian, Persekutuan Malaysia hanya merupakan alasan pihak Barat khususnya British untuk terus bertapak kembali di Asia Tenggara. Di samping tujuan lain mereka, adalah terus memastikan hasil bumi dan kekayaan ekonomi negara-negara di Asia Tenggara dapat dieksploitasi.

Presiden Sukarno mendapat sokongan sepenuhnya dari organisasi-organisasi politik yang berhaluan radikal, terutama sekali PKI untuk melaksanakan dasar politik konfrontasi terhadap Malaysia. Sukarno merasa sangat yakin dengan keputusan yang diambil untuk melaksanakan dasar Ganyang Malaysia setelah mendapat sokongan kuat pelbagai organisasi politik dan masyarakat Indonesia. Selain itu, tentu sekali sokongan dari PKI merupakan satu kekuatan bagi Sukarno, kekuatan PKI yang menguasai hampir keseluruhan organisasi pendukung seperti organisasi buruh, petani, wanita dan pemuda. Mendapat sokongan PKI bermakna Sukarno akan berhasil mendapat sokongan hampir seluruh kekuatan politik di Indonesia ketika itu. Selain itu, selaku Panglima Tertinggi Angkatan Bersenjata Republik Indonesia pastinya semua angkatan tentera berada di bawah pengaruh presiden.

Keupayaan PKI yang mempunyai pengaruh yang besar terhadap hampir keseluruhan organisasi politik dan massa menyebabkan mereka sangat berpengaruh dalam keputusan politik Sukarno. Selain memiliki organisasi buruh, petani, wanita dan pemuda di bawah kendalian mereka, PKI juga menguasai penuh penerbitan dan pengedaran akhbar di Indonesia semasa berlangsungnya Demokrasi Terpimpin. Sepanjang berlangsungnya dasar politik Konfrontasi Mengganyang Malaysia, akhbar menjadi sangat berpengaruh sebagai alat propaganda PKI untuk membantu Sukarno dalam memastikan rakyat memberi sokongan penuh dan memahami apa yang direncanakan oleh pemimpin besar revolusi tersebut.

Harian Rakyat edisi Sambutan Tahun Baru 1963, menyiarkan perutusan daripada Ketua CC PKI, D.N. Aidit yang antara lain isinya merupakan amanat khas yang ditujukan kepada seluruh rakyat Republik Indonesia, khususnya pengikut-pengikut PKI. Tahun 1963 digelar sebagai “Tahun Keberanian”, iaitu sebagai usaha bersama-sama pemimpin dan rakyat Indonesia menyokong dasar-dasar yang dilaungkan oleh Presiden Sukarno. Rakyat diperingatkan supaya menjadi lebih berani melawan kejahatan terutama ketika negara berhadapan dengan musuh asing dari luar dan salahguna kuasa pemimpin-pemimpin yang tamak. Rakyat diseru memberi sokongan penuh terhadap dasar pembaharuan yang dikemukakan oleh Presiden Sukarno dalam Manifesto Politik (Manipol) dan termasuk juga menentang habis-habisan golongan imperialisme yang ingin mengancam kedaulatan dan kemerdekaan Indonesia.

Selain menyiarkan berita dalam bentuk tulisan dan rencana berupa amanat dari pemimpin-pemimpin utama Republik Indonesia dan PKI, *Harian Rakjat* edisi khas tahun 1963 juga menyiarkan karikatur yang mengundang perhatian umum (*Harian Rakjat*, 1963, 1 Januari). Karikatur yang disiarkan dapat memberi kesan khas kepada masyarakat umum yang membaca akhbar harian tersebut. Propaganda menggunakan karikatur lebih mudah menimbulkan kesan kepada rakyat. Rakyat dipengaruhi dengan sesuatu isu yang dibangkitkan sehingga menyebabkan media yang digunakan oleh PKI berhasil menambat hati rakyat untuk menyokong perjuangan mereka.

Harian Rakjat memberi fokus besar terhadap usaha untuk memberi kefahaman kepada masyarakat umum tentang situasi yang sedang dihadapi oleh negara ketika itu. Laporan-laporan berita difokuskan sepenuhnya untuk menarik perhatian rakyat supaya memahami dan menyokong dasar pemerintah yang sedang berdepan dengan masalah Pembentukan Persekutuan Malaysia. Setiap hari topik tentang Malaysia menjadi fokus dan tajuk utama disajikan oleh *Harian Rakjat* untuk menarik perhatian dan bacaan umum. Isu Pembentukan Persekutuan Malaysia dijadikan sebagai isu besar yang sedang dihadapi oleh rakyat Indonesia dan PKI menggunakan kesempatan ini untuk meraih sokongan rakyat bagi mendepani isu ini (*Harian Rakjat*, 1963, 1 Januari-31 September).

Pidato dan amanat Presiden Sukarno menjadi topik utama berita yang disiarkan dan merupakan tajuk akhbar *Harian Rakjat* di halaman depan akhbar. Hampir setiap hari tanpa kecuali akhbar ini akan menyiarkan pidato dan amanat daripada pemimpin-pemimpin utama Republik Indonesia termasuk juga amanat dari Ketua CC PKI D.N. Aidit (*Harian Rakjat*, 1963). Pendekatan meletakkan pidato dan amanat daripada pemimpin besar revolusi di halaman utama merupakan kejayaan besar *Harian Rakjat* untuk menarik perhatian rakyat supaya menyokong dasar pemerintah Republik Indonesia melakukan konfrontasi terhadap Malaysia.

Reaksi terhadap cadangan pembentukan Persekutuan Malaysia diberikan pada awalnya dengan menunjukkan simpati pemimpin dan rakyat Indonesia terhadap perjuangan yang dilancarkan oleh rakyat Kalimantan Utara. *Harian Rakjat* menyiarkan laporan tentang gerakan rakyat Kalimantan Utara yang dipimpin oleh Perdana Menteri Azahari dan membuat seruan supaya rakyat Indonesia memberi sokongan terhadap perjuangan tersebut (*Harian Rakjat*, 1963, 3 Januari). Perjuangan yang bertujuan mendapatkan kemerdekaan penuh bagi rakyat Kalimantan Utara mendapat perhatian khusus dari pemimpin-pemimpin Republik Indonesia. Sukarno mengambil kesempatan ketika menyampaikan amanat beliau kepada rakyat di Bali, menyeru rakyat Indonesia mengambil sikap menyokong perjuangan rakyat Kalimantan Utara. Sukarno menegaskan, beliau sanggup menerima cercaan dari Tunku Abdul Rahman demi menyatakan sokongan kuat terhadap perjuang-pejuang rakyat Kalimantan Utara (*Harian Rakjat*, 1963, 11 Januari).

Harian Rakjat selain memberi tumpuan kepada penyiaran berita tentang perjuangan rakyat Kalimantan Utara, turut memberi tumpuan khusus untuk menanam rasa kebencian rakyat Indonesia terhadap Perdana Menteri Tanah Melayu Tunku Abdul Rahman. Tunku Abdul Rahman merupakan tokoh penting di sebalik cadangan pembentukan Persekutuan Malaysia bersama-sama kerajaan British (*Harian Rakjat*, 1963, 26 Januari). Setiap tindakan dan langkah yang dilakukan oleh Tunku Abdul Rahman selalu mendapat liputan besar terutama

melibatkan penglibatan beliau menumpaskan gerakan pemberontakan di Kalimantan Utara (*Harian Rakjat*, 1963, 24 Januari).

Kebencian rakyat Indonesia terhadap Tunku Abdul Rahman terus disemai dalam *Harian Rakjat* melalui laporan yang disiarkan pada 28 Januari 1963 yang menggambarkan beliau bersikap anti-Indonesia. Sikap dan pendirian Tunku Abdul Rahman seperti yang dilaporkan telah menyebabkan kekecewaan dalam kalangan rakyat Indonesia. Reaksi ini telah menyebabkan timbul desakan dari rakyat yang mendorong pemimpin-pemimpin Indonesia bersedia secara aktif melaksanakan politik konfrontasi terhadap Tengku dan Malaysia (*Harian Rakjat*, 1963, 24 Januari).

Selain paparan berita berbentuk rencana dan tulisan yang menjadi senjata serangan terhadap aksi Politik Konfrontasi Mengganyang Malaysia, penyiaran karikatur sangat menarik perhatian. Karikatur disiarkan dalam pelbagai lakaran untuk menunjukkan kepada rakyat Indonesia sangat bertegas dalam menghadapi konflik dengan Tunku Abdul Rahman dan Tanah Melayu. Karikatur yang disiarkan sangat berkesan untuk membangkitkan sokongan dan menanam rasa kebencian rakyat Indonesia terhadap pemimpin dan rakyat Malaya ketika itu. *Harian Rakjat* menjadi saluran utama pemimpin PKI, terutamanya untuk menyampaikan propaganda yang dapat meraih sokongan rakyat terhadap perjuangan mereka. Selain itu, karikatur yang menyerang Tunku Abdul Rahman menjadi tumpuan yang sangat berkesan disiarkan di *Harian Rakjat*. Penyiaran karikatur ini menggambarkan Tunku Abdul Rahman merupakan pemimpin yang menjadi saingan utama kepada Presiden Sukarno di Asia khususnya di Asia Tenggara.

Karikatur yang memaparkan propaganda melaksanakan rancangan politik Mengganyang Malaysia juga tidak kurang hebatnya disiarkan oleh *Harian Rakjat*. Sepanjang tahun 1963, perang karikatur menjadi sesuatu yang sangat penting untuk meraih sokongan dan simpati rakyat terhadap dasar politik Konfrontasi yang dilaksanakan oleh Indonesia. Karikatur menjadi medium utama yang digunakan oleh PKI untuk membantu dasar politik Presiden Sukarno dalam meraih sokongan rakyat. Strategi yang digunakan PKI menggunakan akhbar *Harian Rakjat* ini sangat berkesan, sehingga berhasil meraih sokongan penuh rakyat Indonesia terhadap aksi mereka Mengganyang Malaysia. Propaganda yang dilakukan oleh PKI memperkuat lagi sokongan rakyat terhadap Sukarno. Walaupun Sukarno memiliki pelbagai kekuatan yang dibina di atas kekuatannya sendiri, tetapi pengaruh sokongan PKI telah memberi keyakinan yang lebih luas kepada beliau untuk meraih sokongan rakyat. Selain itu, karikatur juga digunakan sebagai propaganda untuk mendapatkan sokongan rakyat Indonesia. Sasaran PKI adalah golongan buruh, petani dan pemuda-pemudi yang merupakan kumpulan kuat yang diperlukan sokongan mereka oleh PKI. Kumpulan tersebut sangat diperlukan dalam upaya menyokong dasar-dasar politik Presiden Sukarno.

Gambar 1

Semangat Trikora Mengganyang Malaysia



Sumber: Harijan Rakjat, 27 Juli 1963

Selain daripada menyiarkan berita dan laporan tentang pelaksanaan politik Mengganyang Malaysia, surat khabar *Harian Rakjat* juga memainkan peranan yang penting untuk merancang gerakan rakyat. Rakyat dihasut oleh pemimpin-pemimpin PKI untuk melaksanakan demonstrasi secara besar-besaran di Jakarta dan kota-kota besar lain di Indonesia sebagai menyuarakan bantahan rakyat Indonesia terhadap pengisytiharan Persekutuan Malaysia. Pengisytiharan Persekutuan Malaysia yang dilaksanakan pada 16 September 1963 mendapat bantahan keras oleh Presiden Sukarno dan rakyat Indonesia. Mulai 10 September 1963, *Harian Rakjat* menyiarkan pelbagai laporan berita antara lain isinya merupakan reaksi pemimpin dan rakyat Indonesia terhadap Persekutuan Malaysia. Gerakan demonstrasi anti-Malaysia teretus di seluruh bandar-bandar utama di Indonesia yang mendesak pemerintah Indonesia memboikot pengisytiharan Malaysia yang akan dilaksanakan pada 16 September 1963 (*Harian Rakjat*, 1963, 10 September).

Pada 12 September 1963, *Harian Rakjat* menyiarkan lebih banyak berita berkenaan gerakan-gerakan demonstrasi anti-Malaysia. Misalnya gerakan berpusat di Surabaya yang dipimpin oleh pemuda-pemuda dikenali dengan nama "Arek-Arek Surabaya". Demonstrasi yang dipimpin oleh pemuda-pemuda Surabaya ini melakukan tindakan ganas dengan merempuh masuk ke Konsulat British. Mereka bertindak menurun dan mengoyak-ngoyakkan bendera Union Jack sebagai tanda marah dan kebencian di atas campurtangan British (*Harian Rakjat*, 1963, 12 September). Selain itu, surat khabar juga melaporkan pemimpin Indonesia dan Filipina tidak berpuashati terhadap hasil kerja pasukan PBB yang menjalankan pungutan suara rakyat di Brunei, Sabah dan Sarawak. Serentak dengan itu *Harian Rakjat* menyiarkan berita tentang desakan rakyat melaksanakan aksi Mengganyang Malaysia dan membantu perjuangan rakyat Kalimantan Utara (*Harian Rakjat*, 1963, 16 September). Selain itu terdapat juga desakan supaya Indonesia mengambil tindakan memutuskan hubungan diplomatik dengan British dan kerajaan Malaysia dan melakukan konfrontasi politik terhadap Malaysia.

Selain menyiarkan laporan dalam bentuk berita, karikatur juga menjadi senjata propaganda *Harian Rakjat* untuk menanamkan rasa kebencian rakyat terhadap Malaysia dan kerajaan British. Karikatur juga menjadi senjata utama mendapatkan sokongan rakyat supaya bersedia menjadi tenaga sukarelawan bagi menjayakan misi Mengganyang Malaysia. *Harian Rakjat* terus memainkan peranan besar menyiarkan setiap berita dan laporan terkini tentang konflik Konfrontasi Indonesia-Malaysia kepada masyarakat umum. Peranan yang dilaksanakan oleh *Harian Rakjat* ini telah mendatangkan sokongan rakyat terhadap pelaksanaan dasar konfrontasi. PKI melalui *Harian Rakjat* telah berhasil melaksanakan propaganda yang dapat meraih sokongan besar rakyat terhadap dasar politik Presiden Sukarno (*Harian Rakjat*, 1963, 20 September). Peranan yang dimainkan oleh PKI ini telah menyebabkan pemimpin-pemimpin kanan mereka mendapat kepercayaan dan kedudukan istimewa dalam barisan pentadbiran politik Sukarno. Laporan *Harian Rakjat* pada 22 September 1963 telah menegaskan Sukarno mengambil tindakan menamatkan hubungan ekonomi terhadap Malaysia dan Singapura. Langkah memutuskan hubungan perdagangan dan ekonomi dengan Malaysia telah menyebabkan Indonesia memilih untuk memenuhi tuntutan rakyat supaya dapat mengambil alih semua syarikat dan perusahaan modal asing di Indonesia (*Harian Rakjat*, 1963, 22 September).

Selain menyiarkan laporan berita, karikatur juga memainkan peranan besar yang digunakan oleh *Harian Rakjat* untuk menggambarkan keadaan yang sedang berlaku kepada masyarakat umum. Penyiaran laporan berita tentang peristiwa-peristiwa penting yang berlangsung sepanjang Konfrontasi Indonesia-Malaysia diiringi dengan lakaran karikatur. Karikatur menjadi selingan yang dapat menarik perhatian rakyat untuk terus membaca *Harian Rakjat*. Karikatur merupakan kerja yang wajib digunakan sebagai propaganda PKI melalui surat khabar yang mereka terbitkan sepanjang tahun 1963.

Gambar 2

Karikatur Mengkritik Pelaksanaan Pungutan Suara untuk Mendapatkan Persetujuan Rakyat Supaya Menyokong Pembentukan Persekutuan Malaysia yang Dilaksanakan oleh Wakil PBB.



Sumber: *Harian Rakjat*, 20 September 1963

PKI berhasil melaksanakan tugas mereka untuk memastikan sokongan rakyat bagi membantu Presiden Sukarno melancarkan dasar politik konfrontasi. PKI berhasil mengajak rakyat untuk mengambil bahagian dalam revolusi yang dilancarkan oleh Sukarno. *Harian Rakyat* sangat berkesan mempengaruhi rakyat untuk turut serta dalam kempen mengganyang Malaysia dan menyemai sikap anti-imperialisme. Menjelang bulan Oktober 1963, tajuk-tajuk utama surat khabar pula lebih banyak berkisar tentang langkah-langkah yang diambil oleh pemerintah dalam menyusun perlawanan menentang kuasa-kuasa imperialisme Barat yang membantu Malaysia (*Harian Rakjat*, 1963, 1 Oktober). Indonesia dilaporkan akan menolak semua bentuk bantuan daripada negara luar untuk menyelesaikan masalah dalam negara mereka. *Harian Rakjat* mengkritik Tunku Abdul Rahman, Perdana Menteri Malaysia yang dibantu oleh pasukan perang dari Australia dan New Zealand (*Harian Rakjat*, 1963, 1-28 Oktober).

Dalam Sejarah perkembangan politik di Indonesia, PKI dan Angkatan Bersenjata tidak pernah dapat berkerjasama dengan baik kerana ideologi komunis yang dimiliki oleh PKI. Walau bagaimanapun, di peringkat awal berlangsungnya politik konfrontasi, PKI cuba mengimbangi pengaruh Angkatan Bersenjata terutama TNI-AD dengan menjadi organisasi yang paling dipercayai Sukarno. Sukarno berusaha mengelakkan berlaku konflik dan sering mengingatkan pemimpin atasan TNI-AD supaya tidak bersikap anti-komunis. Pemimpin PKI berusaha untuk bersikap terbuka terhadap kepimpinan Angkatan Bersenjata dan mengelakkan sebarang isu yang dapat melihatkan adanya konflik di antara mereka. PKI berusaha tampil sebagai organisasi yang dekat dengan rakyat kerana memiliki organisasi yang merangkumi seluruh lapisan masyarakat di Indonesia. PKI memiliki pengaruh yang besar dalam organisasi buruh (SOBSI), organisasi tani (BTI), organisasi wanita (GERWANI), organisasi kebudayaan (LEKRA) dan organisasi pemuda dan pelajar. Kekuatan yang dimiliki oleh PKI ini menyebabkan Sukarno sangat dekat dengan organisasi ini.

Menjelang akhir tahun 1963 dan memasuki era tahun 1964, konflik konfrontasi dengan Malaysia menjadi semakin tegang. Indonesia tidak hanya terpaksa berhadapan dengan kekuatan tentera British dan Malaysia, tetapi juga dibayangi oleh kekuatan armada perang Amerika Syarikat (*Harian Rakjat*, 1964). *Harian Rakjat* mendakwa Malaysia yang dibantu oleh Armada Perang Amerika Syarikat menggunakan senjata nuklear untuk mengancam musuh (*Harian Rakjat*, 1963, 15 Disember 1963). Sukarno menanggapi penglibatan Armada ke-7 Angkatan Tentera Amerika ini sebagai satu ancaman untuk menakut-nakutkan Indonesia supaya mengaku kalah dalam konfrontasi dengan Malaysia. Sukarno dengan tegas dalam pidatonya seperti yang disiarkan di dalam *Harian Rakjat*, menegaskan semangat rakyat Indonesia tidak pernah takut dan mahu mengalah walaupun mereka didatangi dengan armada perang yang lebih besar (*Harian Rakjat*, 1963, 20 Disember). Kehadiran pasukan perang Armada ke-7 Amerika Syarikat telah mencetuskan idea kepada sidang redaksi *Harian Rakjat* untuk menyiarkan beberapa karikatur tentang Armada tersebut. Berbagai persepsi dan lakaran karikatur disiarkan sebagai memancing reaksi rakyat Indonesia terhadap perkembangan yang sedang berlaku ketika itu.

Gambar 3


Karikatur Menunjukkan Kehadiran Armada ke-7 Amerika Syarikat di Samudera Indonesia.



Menjelang tahun 1964, suasana konflik Konfrontasi Indonesia-Malaysia menjadi semakin tegang. Konflik ini tidak lagi dilihat dari permusuhan dua pihak, iaitu Indonesia dan Malaysia. Konflik telah menjadi semakin besar apabila melibatkan kuasa-kuasa besar seperti Amerika Syarikat, British dan sekutu-sekutu mereka seperti Jerman Barat, Australia, New Zealand, termasuk beberapa negara di Asia seperti Jepun dan Korea Utara. Kehadiran kapal perang Amerika Syarikat, Armada ke-7 memberi gambaran bahawa konflik akan berlangsung dengan lebih sengit dan semakin meruncing. Ketua CC PKI D.N. Aidit seperti dipetik oleh *Harian Rakjat* pada 4 Januari 1964 menyatakan kehadiran Armada Amerika itu menunjukkan kesungguhan Amerika Syarikat ingin membantu Malaysia mengalahkan Indonesia. Tindakan Amerika itu telah mengundang reaksi dari pelbagai pihak di Indonesia termasuk Presiden Sukarno sendiri untuk mengambil alih seluruh perusahaan dan syarikat milik asing di Indonesia. Langkah ini diambil sebagai membantah tindakan yang telah diambil terlebih dahulu oleh Amerika Syarikat (*Harian Rakjat*, 1964, 1-10 Januari).

Gambar 4

Karikatur Yang Menonjolkan Tunku Abdul Rahman Menjadi Kuda Tunggalan Kuasa Besar Dunia Dalam Memastikan Mereka Terus Berkuasa Menjarah Ekonomi Dan Menguasai Politik Di Asia.




Menjelang akhir bulan Februari 1964, situasi Konfrontasi Indonesia-Malaysia menjadi semakin tegang dan Malaysia mula menunjukkan sikap tidak mahu bertolak-ansur terhadap tuntutan Indonesia. *Harian Rakjat* pada 26 Februari 1964, menyiarkan berita yang dipetik dari ucapan Dr. Subandrio, Menteri Luar Negeri Republik Indonesia bahawa tidak akan ada lagi proses rundingan dengan Malaysia (*Harian Rakjat*, 1965, 26 Februari). Ketua CC PKI juga bertegas bahawa tidak akan ada lagi rundingan dengan Malaysia. *Harian Rakjat* menanggapi ketegasan dua pemimpin utama Indonesia ini dengan menyiarkan karikatur yang menunjukkan sikap tidak gentar Indonesia.

Kemarahan Indonesia semakin meluap-luap apabila dilaporkan British ingin mengisytiharkan perang terhadap Indonesia di atas kedegilan mereka menerima Persekutuan Malaysia (*Harian Rakjat*, 1964, 26 Februari). Amaran yang diberikan oleh British ini telah disambut baik oleh Malaysia. Dalam pertemuan Tun Abdul Razak dan ketua kerajaan dari Thailand, mereka mencapai persetujuan dengan pendirian British bahawa tidak akan ada lagi tolak ansur dan perbincangan lanjut tentang Persekutuan Malaysia. Tun Razak memberi amaran bahawa perang akan meletus bila-bila masa di Kalimantan Utara kerana jalan damai sudah tertutup dengan Indonesia (*Harian Rakjat*, 1964, 27 Februari).

Presiden Sukarno keesokan harinya di dalam *Harian Rakjat* membalas amaran British dan Malaysia itu dengan nada keras bahawa Indonesia telah membulatkan tekad untuk terus mengganyang Malaysia. Sukarno kesal dengan sikap angkuh pemimpin Malaysia yang meletakkan syarat Indonesia mesti terlebih dahulu melakukan peletakan senjata sebelum mahu ke meja perundingan. *Harian Rakjat* memetik pernyataan Sukarno bahawa tindakan pemimpin Malaysia itu dibayangi oleh desakan dari British dan Amerika Syarikat (*Harian Rakjat*, 1964, 28 Februari). *Harian Rakjat* telah menyiarkan karikatur tentang gelombang penentangan pejuang-pejuang Kalimantan Utara untuk menghancurkan Malaysia. Karikatur ini menggambarkan bahawa rakyat Indonesia tidak pernah takut untuk menghadapi ancaman dari Malaysia dan akan terus membantu perjuangan rakyat Kalimantan Utara.

Gambar 5

Karikatur Gerakan Revolusi Kalimantan Utara Yang Akan Menghancurkan Malaysia Dan Sekutu Mereka British Dan Amerika Syarikat.



Konflik Konfrontasi Indonesia-Malaysia menjadi semakin meruncing setelah pertemuan di Bangkok, Thailand gagal mencapai kata sepakat. *Harian Rakjat* pada 5 Mac 1964 melaporkan, delegasi Indonesia kecewa dengan sikap Tun Abdul Razak, Timbalan Perdana Menteri Malaysia yang mengancam Indonesia supaya menerima tuntutan mereka (*Harian Rakjat*, 1964, 5 Mac). Keesokan harinya *Harian Rakjat* melaporkan perjumpaan di Bangkok telah menemui jalan buntu. Delegasi Indonesia yang tidak berpuas hati dengan persidangan tersebut telah meminta disediakan kapal terbang untuk pulang dan menarik diri daripada meneruskan perundingan (*Harian Rakjat*, 1964, 6 Mac).

Dr. Subandrio, Menteri Luar Negeri yang memimpin delegasi Indonesia menegaskan beliau menggelengkan kepala menolak untuk diadakan gencatan senjata dan menjelaskan tidak akan ada lagi gencatan senjata selepas ini (*Harian Rakjat*, 1964, 7 Mac). Pelbagai reaksi diberikan oleh organisasi-organisasi politik di Indonesia terhadap situasi terkini konflik Konfrontasi Indonesia-Malaysia. Front Pemuda Rakyat yang mewakili sayap pemuda PKI dipetik dari laporan *Harian Rakjat* pada hari yang sama disiarkan pernyataan Dr. Subandrio, mendesak supaya ditubuhkan pasukan komando sukarelawan untuk mengganyang Malaysia. Cadangan yang ajukan oleh Front Pemuda Rakyat tersebut disambut baik oleh Presiden Sukarno (*Harian Rakjat*, 1964, 10 Mac).

Cadangan pembentukan pasukan sukarelawan untuk mengganyang Malaysia telah mendapat sambutan dan sokongan dari semua lapisan rakyat Indonesia. Sokongan padu dari pelbagai organisasi terhadap cadangan ini disiarkan setiap hari oleh *Harian Rakjat* dan mendapat pelbagai reaksi yang kesemuanya menyokong tindakan dan cadangan untuk menubuhkan pasukan komando sukerelawan. Melihat kepada sokongan yang besar diperoleh daripada pelbagai lapisan rakyat, Sukarno telah mengeluarkan perintah kepada Panglima Angkatan Bersenjata Republik Indonesia supaya siap untuk melaksanakan amanah rakyat. Ketua CC PKI D.N. Aidit pula dalam Kongres Pemuda Rakyat yang diadakan telah menyeru kepada semua ahli dan organisasi pro-komunis di Indonesia bertekad untuk terus berada di belakang Presiden Sukarno mengganyang Malaysia dan melepaskan diri dari kesulitan ekonomi. *Harian Rakjat* melaporkan, gesaan Aidit tersebut telah disambut baik oleh semua organisasi-organisasi pemuda, mahasiswa dan dibentuk Front Nasional bersedia untuk mendaftar barisan para sukarelawan (*Harian Rakjat*, 1964, 18 Mac).


Menjelang 19 Mac 1964, *Harian Rakjat* melaporkan puluhan ribu rakyat Jakarta telah mendaftar diri kepada Front Nasional untuk menjadi Sukarelawan. Sambutan tersebut kerana sikap marah mereka terhadap sikap bongkak Tunku Abdul Rahman terhadap Indonesia (*Harian Rakjat*, 1964, 19 Mac). Sambutan rakyat untuk menyertai pasukan komando sukarelawan adalah di luar dugaan. Front Nasional telah melaksanakan pendaftaran sukarelawan hampir di seluruh Indonesia. Melihat perkembangan tersebut, Sukarno menaruh keyakinan Sang Merah Putih akan berada di puncak (*Harian Rakjat*, 1964, 20 Mac). *Harian Rakjat* pada 25 Mac 1964, melaporkan sebanyak 18 juta sukarelawan telah mendaftar diri kepada Front Nasional dan siap untuk dihantar bertempur (*Harian Rakjat*, 1964, 25 Mac).

Semangat yang berkobar-kobar dalam kalangan rakyat dan pemuda Indonesia menyertai pasukan komando sukarelawan itu disiarkan juga dalam bentuk karikatur oleh *Harian Rakjat*. Sebagaimana rancaknya laporan berita yang disiarkan oleh akhbar tersebut, begitu jugalah dengan penyiaran karikatur supaya mendapat sokongan besar dari masyarakat umum. Propaganda PKI melalui *Harian Rakjat* dilihat sangat berkesan kerana sambutan yang

diberikan oleh semua lapisan rakyat yang mendaftarkan diri untuk menyertai pasukan komando Sukarelawan adalah sangat luar biasa.


Gambar 6

Karikatur “Daftar Sukarelawan Indonesia” Untuk Menyertai Pasukan Komando Ganyang Malaysia.



Gambar 7

Karikatur Semangat Persatuan Buruh Dan Rakyat Siap Sedia Mengganyang Malaysia.



Konflik Konfrontasi Indonesia-Malaysia masuk ke fasa yang lebih mencabar menjelang tahun 1965. Konflik ini dilihat berpanjangan dan tidak memberi sebarang petanda bila akan berakhir. Sukarno dengan lantang menyatakan kesediaan Indonesia untuk menarik diri dari keanggotaan PBB. *Harian Rakjat*, 1 Januari 1965 membuka tirai tahun 1965 dengan menyiarkan tajuk utama berita tentang ancaman Presiden Sukarno bahawa Indonesia akan menarik diri dari keanggotaan PBB jika usul Malaysia diterima sebagai Anggota Dewan Keamanan PBB (*Harian Rakjat*, 1965, 1 Januari). Ketua CC PKI D.N. Aidit menyifatkan tindakan Sukarno untuk membawa keluar Indonesia dari PBB merupakan sikap dan keputusan semua rakyat Indonesia yang progresif (*Harian Rakjat*, 1965, 4 Januari). Tindakan Sukarno untuk menarik diri daripada keanggotaan Indonesia di PBB juga dipersetujui oleh Dr. Subandrio, Menteri Luar Negeri Indonesia. Dr. Subandrio berpendapat, tindakan menarik dari PBB akan membuka peluang kepada Indonesia untuk memperkasakan CONEF (Conference of The New Emerging Forces (Ricklefs, 1991). *Harian Rakjat* pada 7 Januari 1965 memetik ucapan Presiden Sukarno di upacara penubuhan CANEFO; “Mahkota kemenangan bukan keanggotaan PBB, tetapi berdiri di atas kaki sendiri. Saya bertindak bukan atas kemahuan sendiri, tetapi sekadar penyambung lidah rakyat. Malaysia adalah pengkalan militer asing, kita bebas buta huruf tanpa bantuan UNESCO.” (*Harian Rakjat*, 1965, 7 Januari).

Pengaruh PKI yang sangat kuat terhadap Sukarno menyebabkan perjalanan politik dan dasar yang diambil oleh Presiden Sukarno banyak dibayangi oleh kemahuan PKI. PKI berhasil menggunakan Sukarno untuk menyingkirkan semua lawan politik mereka (*Harian Rakjat*, 1965, Januari-Oktober). Dalam bidang penerbitan akhbar, PKI telah berhasil menyakinkan Sukarno untuk mengharamkan semua akhbar yang bersifat kontra-revolusi. Oleh yang demikian hanya akhbar-akhbar yang pro revolusi sahaja dibenarkan untuk diterbitkan dan diedarkan kepada umum. Ini bermakna hanya akhbar-akhbar milik PKI dan organisasi yang pro-PKI sahaja yang boleh menerbitkan akhbar. *Harian Rakjat* menjadi akhbar yang paling berpengaruh dan menjadi alat propaganda PKI untuk mengganyang musuh-musuh politik mereka.

Gambar 8

Karikatur “Deklarasi Rakyat : Tari Gayang Nekolim”.



Penarikan diri Republik Indonesia dari PBB merupakan kejayaan besar bagi PKI. *Harian Rakjat* bertarikh 15 Januari 1965 memetik kata-kata D.N. Aidit bahawa, tindakan Indonesia keluar dari PBB akan membuatkan mereka menjadi lebih merdeka (*Harian Rakjat*, 1965, 15 Januari). PKI memang menginginkan Indonesia dimusuhi oleh Amerika Syarikat dan sekutu-sekutunya. Keputusan yang diambil oleh Presiden Sukarno untuk keluar dari PBB menyebabkan Indonesia menjadi negara yang bersikap anti-Amerika. Kesempatan ini digunakan oleh PKI untuk mempengaruhi Presiden Sukarno untuk menjalin hubungan baik dengan negara-negara Blok Komunis seperti Soviet Union dan Republik Rakyat China (*Harian Rakjat*, 1965, 26 Januari).

Delegasi Indonesia telah mengadakan kunjungan ke China dan diberi sambutan besar-besaran di Peking. Ketika majlis sambutan delegasi Indonesia diadakan, pemimpin Republik Rakyat China telah menyatakan ikrar bahawa 650 juta rakyat China tidak akan membiarkan rakyat Indonesia diserang oleh tentera Amerika Syarikat dan British (*Harian Rakjat*, 1965, 25 Januari). Sokongan yang ditunjukkan oleh Republik Rakyat China, menurut Dr. Subandrio menyebabkan Indonesia tidak gentar menghadapi ancaman-ancaman dari Amerika Syarikat dan British yang membantu mempertahankan Malaysia. Dr. Subandrio juga dipetik dari laporan *Harian Rakjat* berkeyakinan penuh imperialisme Amerika Syarikat dan British mampu dilenyapkan (*Harian Rakjat*, 1965, 27 Januari).

Di dalam satu lagi perjumpaan lain dengan Persatuan Rakyat Indonesia di China, Dr. Subandrio menjelaskan Republik Rakyat China merupakan kekuatan yang maha besar bersikap anti-imperalisme (*Harian Rakjat*, 1965, 28 Januari). Ketua CC PKI, D.N. Aidit menyambut baik jalinan kerjasama dan persefahaman RI-RRC. Aidit yakin, jika tentera British dan Amerika Syarikat menyerang Indonesia, maka di Indonesia akan berlaku banjir revolusi (*Harian Rakjat*, 1965, 1 Februari).

Menurut Sukarno, tahun 1965 merupakan tahun terbaik dari segi perancangan dan persediaan Indonesia melaksanakan politik Konfrontasi terhadap Malaysia (*Harian Rakjat*, 1965, 6 Februari). Indonesia akan menggempur segenap kekuatan tentera imperialis yang menggugat keamanan negara Republik Indonesia. Bagi tujuan tersebut, Presiden Sukarno bersetuju dengan cadangan Ketua CC PKI, D. N. Aidit untuk menyediakan senjata untuk kaum buruh dan petani (*Harian Rakjat*, 1965, 10 Februari). Cadangan ini yang diwar-warkan di *Harian Rakjat* telah mendatangkan reaksi positif dari kumpulan pemuda, mahasiswa dan pelajar. Kumpulan ini telah melancarkan demonstrasi selama dua hari di Kedutaan Amerika Syarikat di Jakarta.

Selain itu mereka telah mengambil alih bangunan USIS (Yayasan Sosial Amerika Syarikat) dan seramai 250 ribu penduduk Jakarta mengutuk tindakan pasukan perisik dari Amerika yang terlibat dalam kegiatan kontra-revolusi dan anti-Sukarno (*Harian Rakjat*, 1965, 13-15 Februari). Kehadiran pasukan risikan Amerika Syarikat (CIA) telah mendapat perhatian dan kecaman dari Presiden Sukarno. Sukarno ketika menyampaikan pidato kepada Persatuan Wartawan Indonesia (PWI), menjelaskan CIA Amerika Syarikat telah memanfaatkan BPS (Barisan Pencinta Sukarnoisme) untuk menjatuhkan beliau dan pemerintah Indonesia. Disebabkan hal tersebut, Presiden Sukarno telah bertindak mengharamkan semua akhbar, majalah dan organisasi yang mempunyai hubungan dengan BPS (*Harian Rakjat*, 1965, 24 Februari).

Kehadiran pasukan risikan Amerika Syarikat yang cuba mencetuskan kekacauan dan melemahkan pemerintah Indonesia menjadi fokus berita *Harian Rakyat* menjelang bulan Mac sehinggalah Ogos 1965.

Tumpuan berita berkaitan konflik Konfrontasi Indonesia-Malaysia hanya tidak lagi menjadi perhatian besar kepada PKI dan *Harian Rakyat*. PKI semakin berpengaruh dalam pelaksanaan dasar politik yang diambil oleh Sukarno. Selain itu organisasi-organisasi PKI giat menjalankan aktiviti untuk mengembangkan pengaruh komunis di Indonesia. PKI juga telah berhasil menyingkirkan hampir semua organisasi politik anti-komunis melalui propaganda-propaganda yang dilakukan oleh Biro Politik PKI (Politbiro). Menjelang pertengahan tahun 1965, PKI telah berhasil menguasai keseluruhan organisasi politik di Indonesia, termasuk menyerap masuk ke organisasi tentera. Presiden Sukarno lebih mempercayai PKI yang memiliki pengikut yang berjiwa revolusi dan dapat membantu mencapai cita-cita politik Sukarno menyingkirkan kuasa besar imperialisme seperti Amerika Syarikat dan British.

KESIMPULAN

Kajian ini merupakan satu usaha untuk melihat secara lebih mendalam terhadap peranan propaganda surat khabar *Harian Rakyat* milik Partai Komunis Indonesia semasa Konfrontasi Indonesia- Malaysia. Tidak dapat dinafikan, PKI merupakan organisasi politik yang sangat berpengaruh terhadap Sukarno semasa era Demokrasi Terpimpin. Perubahan era politik selepas zaman Pendudukan Jepun telah memberi dampak yang besar kepada iklim politik di Tanah Melayu dan Indonesia. British kembali mempengaruhi perubahan politik di Tanah Melayu. Di Indonesia keadaan sebaliknya berlaku, pemimpin dan rakyat Indonesia terus mempertahankan kemerdekaan yang diproklamasikan pada 17 Ogos 1945 dan melancarkan revolusi bersenjata menentang kemasukan semula tentera Belanda. Kesempatan ini digunakan oleh golongan berhaluan kiri yang radikal seperti Parti Komunis Indonesia untuk bersama-sama berjuang mempertahankan kemerdekaan Indonesia agar satu ketika dapat merealisasikan impian mereka menubuhkan negara Republik Komunis Indonesia.

Sehubungan dengan itu apabila terjadinya konflik di antara pemerintahan Indonesia dan Malaysia menjelang pembentukan Persekutuan Malaysia. Partai Komunis Indonesia telah memainkan peranan besar melalui propaganda surat khabar dengan pelbagai cara untuk mendapatkan sokongan rakyat bagi mengganyang Malaysia. PKI sejak awal lagi telah menyatakan sokongan kuat mereka terhadap langkah Sukarno melancarkan Konfrontasi terhadap Malaysia. Kesungguhan PKI ini diterjemahkan melalui propaganda mereka di surat khabar, antaranya di *Harian Rakyat*. Surat khabar ini menjadi saluran utama untuk melakukan propaganda mendapatkan simpati dan sokongan rakyat Indonesia untuk menyokong perjuangan menentang Malaysia. PKI secara agresif dan sangat terancang dalam menyusun strategi untuk membakar api kemarahan rakyat melalui laporan berita dan menyiarkan rencana-rencana khas untuk melaporkan kepada rakyat seolah-olah rakyat Malaysia berniat jahat. Propaganda yang dilakukan oleh PKI terutamanya melalui *Harian Rakyat* dilihat sangat berpengaruh dan berjaya meraih simpati dan majoriti sokongan rakyat untuk menyokong kerajaan Indonesia melakukan aksi menentang Malaysia.

Propaganda *Harian Rakjat* dan surat khabar lain milik mereka menunjukkan penglibatan PKI secara serius dalam konfrontasi. Situasi ini telah berjaya menjadikan parti ini antara yang dominan dalam mempengaruhi dasar politik Sukarno. PKI juga telah berjaya menawan hati rakyat kerana menunjukkan sikap revolusioner dalam pendirian mereka semasa konfrontasi Indonesia-Malaysia berlangsung. Sukarno sendiri sangat menghargai sokongan PKI yang berjaya mendapatkan sokongan rakyat Indonesia menghadapi aksi politik luar negeri yang tidak memihak kepada Indonesia ketika itu. Indonesia menghadapi tekanan dari negara-negara kuasa Barat seperti Amerika Syarikat, Britain, Australia dan New Zealand ketika memilih untuk melaksanakan politik konfrontasi. Sokongan rakyat sangat penting untuk menentukan dasar perjuangan yang dipilih selari dengan keinginan rakyat. Kesempatan ini dimanfaatkan oleh PKI untuk mendapat pengaruh yang lebih besar dalam pentadbiran Sukarno. Tentu sekali PKI memanfaatkan *Harian Rakjat* serta juga *Bintang Timur* untuk meraih sokongan rakyat. Di sisi lain, penglibatan PKI membuktikan Sukarno sangat bergantung kepada parti berhaluan kiri tersebut untuk mendapat sokongan rakyat bagi menyokong dasar politik yang beliau pilih, termasuk memenangankan kempen mengganyang Malaysia.

PENGHARGAAN

Penyelidikan ini tidak mendapat geran khusus dari mana-mana agensi pembiayaan di sektor awam atau komersial.

RUJUKAN

- Ahamad Jama' Amin Yang & Mohd Samsudin. (2017). "Polimik Aliran Marxisme dalam Gerakan Nasionalisme dan Perkembangan Politik Radikal Melayu, 1925-1948", dalam *Jurnal Kemanusiaan*. 24(2), 31-58.
- Andi Suwitra. (2010). "Dua negara Melihat Masa Lalunya: Konfrontasi Indonesia-Malaysia (1963-1966) sebagaimana Dikisahkan dalam Buku-buku Teks Sejarahnya di Sekolah", dalam *Jurnal Sosiohumanika*. Vol.2. Jakarta.
- Andi Suwitra. (2002). "Pers, Revolusi, dan Demokratisai: kehidupan dan pandangan lima surat khabar di Jawa pada masa Revolusi Indonesia, 1945-1947," *HISTORIA: Jurnal Pendidikan Sejarah*. 6(3).
- Budiawan, S. S. (2019). Ketua Program Penelitian, Pengabdian dan Publikasi Sekolah Pascasarjana dan Sejarawan, Universitas GajahMada, Yogyakarta. Wawancara dilakukan di Sekolah Pascasarjana UGM pada 7 dan 9 Disember 2019.
- DO 169/518. (1964). Indonesia Confrontation Against Malaysia- Internal Developments, 15 Januari 1964.
- DO 169/70. (1964). Telegram dari Jakarta kepada Kementerian Luar Negeri No. 27, 3 April 1964.
- Departmen Luar Negeri RI. (1964). *Kumpulan Bahan-Bahan Mengenai Malaysia*. Jakarta: Direktorat Asia Timur Laut. 1963-1964.
- Departmen Luar Negeri RI. (1965). *Documenta Diplomatica, Confrontation Documents. Indonesian Intention towards Malaysia*. 1964. Kuala Lumpur: Jabatan Penerangan Malaysia.

- FO 371/180315. (1964). Surat Andrew Gilchrist kepada E.H. Peck di Kementerian Britain, 29 Desember 1964.
- FO 371/181490. (1965). Telegram 285 dari Kementerian Luar Britain kepada Jakarta, 11 Februari 1965.
- FO 371/17288. (1964). Memo American Aid to Indonesia and British Trade with Cuba, China and The Soviet Union, 22 Februari 1964.
- FO 371/1762582. (1964). Letters Indonesian Aggression Againsts Mainland Malaysia. Malaysian Letters to UN Security Council, Jabatan Penerangan Malaysia.
- Harian Rakjat.* (1963). "D.N. Aidit di Rapat Umum Bandung: Ganyang Malaysia Dengan Jalan Revolusi", 13 Oktober 1963, hlm. 1.
- Harian Rakjat.* (1963). "D.N. Aidit, Indonesia Tidak Akan Ambrok Kerana Kesulitan Ekonomi dan Malaysia Pasti Akan Kalah", 24 Februari 1963, hlm. 1.
- Harian Rakjat.* (1963). "Demonstrasi GANEFO Mengganyang Malaysia", 17 September 1963, hlm. 1.
- Harian Rakjat.* (1963). "Boikot Proklamasi Malaysia – Demonstrasi di Medan", 10 September 1963, hlm. 1.
- Harian Rakjat.* (1963). "Front Pemuda Desak Komando Mobilisasi Umum Untuk Mengganyang Malaysia dan Membantu Rakyat Kalimantan Utara", 7 Mac 1963. hlm .1.
- Harian Rakjat.* (1963). "Gelombang Anti-Malaysia Menaik: Arek-Arek Surabaya Berdemonstrasi ke Konsulat Inggeris – Bendera Inggeris diturunkan dan dirobek", 12 September 1963, hlm. 1.
- Harian Rakjat.* (1963). "Ganyang Habis-habisan Malaysia: Revolusi Indonesia bahagian tak terpisahkan dari Revolusi Sosialis Dunia", 30 September 1963, hlm. 1.
- Harian Rakjat.* (1963). "Gerilawan Sarawak Beraksi: Gerakan Komunis International dan Revolusi Asia Tenggara – D.N. Aidit", 3 Oktober 1963, hlm. 1.
- Harian Rakjat.* (1963). "Ketua CC PKI D.N. Aidit: Bung Karno, Aidit dan PKI Alat Revolusi – Tengku CS Alat Imperialis Barat", 14 Nov 1963, hlm. 1.
- Harian Rakjat.* (1963). "Malaya di bawah Pimpinan Tengku Abdul Rahman Menjadi Negara Polisi", 7 Februari 1963, hlm. 1.
- Harian Rakjat.* (1963). "Menlu Subandrio: Kita Harus Menjalankan Politik Konfrontasi Dengan Malaya", 19 Januari 1963, hlm. 1.
- Harian Rakjat.* (1963). "Menlu Subandrio: Kita Secara Aktif Hadapi Tengku – Indonesia Terpaksa Menjalankan Politik Konfrontasi Terhadap Malaya", 26 Januari 1963, hlm. 1.
- Harian Rakjat.* (1963). "Menlu Subandrio: Tengku Mahu Perkuat Kedudukan atas Penghasutan Terhadap Indonesia", 19 Februari 1963, hlm. 1.
- Harian Rakjat.* (1963). "Malaysia dinyatakan Dalam Keadaan Perang: Pemerintah Australia turut bertanggung jawab mempertahankan Malaysia, 6 Januari 1963, hlm.1.
- Harian Rakjat.* (1963). "Presiden Sukarno: Malaysia dibentuk Untuk Kepung Indonesia dan Tiongkok", 10 November 1963, hlm. 1.
- Harian Rakjat.* (1965). "Presiden Sukarno: PKI Unsur Hebat Dalam Penyelesaian Revolusi", 24 Mei 1965, hlm. 1.
- Harian Rakjat.* (1963). "PM Azahari: Pertempuran Terus Berkobar di Kalimantan Utara", 2 Januari 1963, hlm. 1.
- Harian Rakjat.* (1963). "Putuskan Hubungan Diplomatik Dengan Inggeris dan Malaya – Laksanakan Konfrontasi Politik dan Ekonomi Secara Konsekwen", 16 September 1963, hlm. 1.

- Harian Rakjat.* (1963). "PBFN Bentuk Komando Mengganyang Malaysia", 22 September 1963, hlm 1.
- Harian Rakjat.* (1963). "Rakyat Indonesia Menolak Malaya – Duta Bear RI di Persekutuan Tanah Melayu", 3 Februari 1963, hlm. 1.
- Harian Rakjat.* (1963). "Rancangan Gerakan Tani: Mengganyang Malaya", 27 September 1963, hlm. 1.
- Harian Rakjat.* (1963). "Pesanan Tahun Baru D.N. Aidit : Jadikan Tahun 1963 Tahun Keberanian!", 1 Januari 1963, hlm. 1
- Harian Rakjat.* (1963). "Tengku Akui Kirim Pasukan ke Brunei", 4 Januari 1963, hlm. 1.
- Harian Rakjat.* (1963). "Tengku Mengangkat Tokoh Pemberontak PRRI", 6 Januari 1963, hlm. 1.
- Harian Rakjat.* (1963). "Kita Sokong Perjuangan Rakyat Kalimantan Utara Biarpun Tengku Mencerca Kita", 11 Januari 1963, hlm. 1.
- Harian Rakjat.* (1963). "Tengku Mahu Usir Orang-Orang Indonesia dari Malaya", 14 Februari 1963, hlm. 1.
- Harian Rakjat.* (1963). "Tengku Pengeran yang Ambisius dan Tokoh Terpenting di Asia Alat Imperialis Inggeris", 19 Februari 1963, hlm. 1.
- Harian Rakjat.* (1963). "Wakil Ketua CC PKI Nyoto: Hajar Terus Malaysia – Pemogokan dan Ambil Alih Senjata Anti-Imperialis", 23 September 1963, hlm. 1.
- Harian Rakjat.* (1964). "Presiden Sukarno: Perhebat Aksi Ganyang Malaysia, 3 Januari 1964, hlm. 1.
- Harian Rakjat.* (1964). "Perusahaan-Perusahaan Inggeris Diambil-Alih Oleh Kaum Buruh: Diserah Kepada Pemerintah Untuk Jadi Milik Negara", 20 Januari 1964, hlm. 1.
- Harian Rakjat.* (1964). "Pemuda Rakyat Harus Bantu TNI: Salam 3 Juta Komunis Kepada 2 Juta Pemuda Rakyat", 16 Jun 1964, hlm. 1.
- Harian Rakjat.* (1964). "Armada VII Ancam Asia Tenggara", 1 Januari 1964, hlm. 1.
- Harian Rakjat.* (1964). "Kecongkakan Tengku Dijawab Rakyat Jakarta: Puluhan Ribu Massa Daftar Diri Jadi Sukarelawan", 18 Mac 1964, hlm. 1.
- Harian Rakjat.* (1964). "D.N. Aidit Kepada Pemuda Rakyat: Membubarkan Malaysia Adalah Satu Kewajiban", 16 Jun 1964, hlm. 1.
- Harian Rakjat.* (1965). "Rapat Komando Presiden Keluar PBB – Jutaan Sukarelawan Siap Dipersenjatai", 18 Januari 1965, hlm. 1.
- Harian Rakjat.* (1965) "Aidit: Jadikan Harian Rakyat Senjata yang Ampuh ditangan Rakyat", 28 Januari 1965, hlm. 1.
- Harian Rakjat.* (1965) Januari 1963-Oktober 1965.
- Harian Rakjat.* (1965). "D.N. Aidit: Persenjatakan Kaum Buruh dan Tani Untuk Menghadapi Agresi Biadap Inggeris", 15 Januari 1965, hlm. 1.
- Harold, F. G. (1958). "Indonesian go to The Polls: The Parties and Their Stand on Constitutional", *Midwest Journal of Political Science*, 189.
- Jean G. (1968). "The Rise and Demise of Confrontasi: Impact on Politics in Malaysia", dalam *International Journal of Indonesian Studies*, 325-339.
- Kolonel Dr. Kesuma Espe, Dirjen Pusat Sejarah TNI. (2019). Wawancara dilakukan di Pusat Sejarah Markah Besar TNI, Jalan Gatot Subroto, No 16, Kuningan, Jakarta Pusat, pada 11 dan 12 Disember 2019.
- Koleksi Arkib Republik Indonesia, Jakarta. (1965). Catatan Harian Rosihan Anuar pada masa Demokrasi Terpimpin, dalam Rosihan Anuar, *Sukarno, Tentara dan PKI, Segitiga Kekuasaan Sebelum Prahara Politik 1961-1965*.

- Kiki Zakiah. (2012). "Pencitraan Indonesia di Media Massa Malaysia", dalam *Jurnal Ilmu Komunikasi*, Vol.2, No.1, Jakarta.
- Kertas Putih Kerajaan Malaysia. (1963). *Malaysia-Indonesia Relations*. 1963. Kuala Lumpur: Jabatan Penerangan Malaysia. 31 Ogos 1957-15 September 1963.
- Linda Sunarti. (2014). "Politik Luar Negeri Malaysia terhadap Indonesia, 1957-1976: Dari Konfrontasi Menuju Kerjasama", dalam *Jurnal Kajian Sejarah & Pendidikan Sejarah*, 2(1), 65-80.
- Mohammad Rodzi Abd Razak. (2001). "Gestapo dan Penyelesaian Konfrontasi Malaysia-Indonesia," dalam *Jebat*, 28, 75-106.
- Mohd Noor Mat Yazid. (2016). "Malaysia-Indonesia Relations Before and After 1965: Impact on Bilateral and Regional Stability", dalam *Programme of International Relations*, 2016, UMS, Kota Kinabalu.
- Maman, S. M. (2007). "Gerakan Budaya Menjelang Kemerdekaan Indonesia-Malaysia", dalam *Makara Sosial Humaniora*, 11(2), 48-57.
- Malaysia/Indonesia Relations 31 August 1957-15 September 1963*. Kuala Lumpur: Kementerian Luar Negeri.
- Nurliana Suhaini & Aimi Khairunnisa. (2016). "Konfrontasi Malaysia dan Indonesia: Penyelesaian Melalui Pendekatan Malaysia", dalam *Jurnal Sains Sosial*, 1, 74-94.
- Prof. Dr. Salim Said. (2019). Guru Besar Universitas Pertahanan Nasional Indonesia dan bekas wartawan Majalah Tempo 1964-1966. Wawancara dilakukan di Institut Peradaban Indonesia, N0. 56, Jalan Prof. Supomo, Tebet, Jakarta, pada 10 Disember 2019.
- Perjanjian Persahabatan antara Persekutuan Tanah Melayu dengan Republik Indonesia*. (1959). Kuala Lumpur: Pencetakan Kerajaan.
- Pluvier, J. M. (1966). *Confrontation: A Study in Indonesia Politics*. Oxford University Press.
- Rohani Ab. Ghani. (2012). "British Sebagai Caretaker di Indonesia 1945-1946", dalam *Jurnal Jebat*, 39(1), 127-149.
- Rohani Ab. Ghani. (2007). "Situasi Dalaman Indonesia Menjelang Kudeta 30 September 1965", dalam *Jurnal Jebat*, 34, 29-48.
- Runalan Soedarmo. (2014). "Perkembangan Politik Partai Komunis Indonesia (1948-1965)", dalam *Jurnal Artefak*, 2, (1), 129-138.
- Ridwan Saidi. (2020). Budayawan Indonesia, Bekas Ahli Dewan Perwakilan Rakyat Indonesia era Demokrasi Terpimpin dan Orde Baru. Wawancara melalui aplikasi telefon pada 23 Februari 2020.
- Ruth M. V. (1969). *Nationalism, Islam and Marxism: The Management of Ideology Conflict in Indonesia*. Cornell University Press.
- Sahul Hamid Mohamed Maidin. (2010). *Propaganda dan Perang Saraf Dalam Era Konfrontasi Malaysia-Indonesia, 1963-1966*. Tesis Sarjana Sastera, Jabatan Sejarah Universiti Malaya.
- Sah-Hadiyatan Ismail. (2016). "Amerika Syarikat dan Konfrontasi Indonesia-Malaysia 1963-1966. Dalam *Jebat*, 43,(1), 65-89.
- Sinaga, E. D. (1960). *Communism and The Communist Party in Indonesia* (MA Thesis). George Washington University School of Government.
- Weber, R. P. (1976). *Indonesian Foreign Policy and the Dilemma of Independence*. Cornell University Press.
- Weinstein, F. B. (1976). *Indonesian Foreign Policy and the Dilemma of Dependence from Soekarno to Soeharto*, Cornell University Press.
- Why Indonesia Opposes British-Made Malaysia*. (1964). Republic of Indonesia Publication.

Yadi Kusmayandi. (2014). “Politik Luar Negeri Republik Indonesia Pada Masa Konfrontasi Indonesia-Malaysia Tahun 1963-1966”, dalam *Jurnal Kajian Sejarah & Pendidikan Sejarah*, 2 (1), 23-34.